

蘇魏公文集

附魏公譚訓


下冊

〔宋〕蘇頌 著

王同策 管成學 顏中其等點校



中華書局



〔宋〕蘇頌著

王同策管成學顏中其等點校

蘇魏公文集

下冊

（附魏公譚訓）

中華書局

蘇魏公文集卷三十八

表

杭州謝上

臣某言：昨奉勅差知杭州軍州事充兩浙西路兵馬鈐轄，已於四月初四日到任禮上訖者。東南方面，地實據於上游。左右省符，詔俾分於半竹。顧乏幹時之譽，謬當治劇之名。蒞職云初，懷章有媿。臣某中謝。伏念臣素惟寡陋，早荷甄收。自觸憲章，坐鑄禁籍。出麾良翰，已涉歷於歲時；入覲嚴宸，復進趨於臺閣。一昨代還睢甸，攝職京司，日奉內庭之朝，預陪近著之列。會江吳之關守，方淮海之游飢。晨食宵衣，上軫帝心之慮；雄藩督府，遽叨使節之榮。奉臨遣之丁寧，重憂思之惕厲。兼馳川陸，達除書所治之邦；既見吏民，布主上欲安之訓。事叢有責，才薄難勝。常自省思，敢遑寧處。此蓋伏遇皇帝陛下躬臨庶政，周慮萬方。每惟政治之源，莫重長人之寄。謂此一邦之會，（一）素號要煩；眷茲累久之勤，因而任使。臣敢不悉心竭力，求瘼卹菑，以荒政之所宜，爲職事之先急。農桑衣食，勸

家戶以趨時，期會簿書，率掾丞而奉法。少收州郡之課，上副聖神之懷。臣無任。

謝同修國史

臣某言：伏奉勅命差臣同修仁宗皇帝、英宗皇帝正史者。兩朝大典，方經始於冊書；太史諸僚，遂擢收於疎外。祇膺明詔，深負愧顏。臣某中謝。伏以載籍之司，事言尤重。非宣尼之聖，莫能斷唐虞之典謨；有馬遷之才，然後成周漢之紀傳。恭惟二聖之功烈，超邁百王之規樞。禮樂文章，經天而緯地；賢能道義，華國而熙朝。惟其類例之繁，必假約修之善。自非傑筆，未易充員。伏念臣薄枯孤生，諛聞淺識，亦嘗學於舊史，敢自託於無能。久習史文，寢忘緒業。遠方隨牒，姑安州郡之勤；嚴召賜環，忽被絲綸之寵。俾趨馳於輶傳，俄入覲於宸庭。脫沈迷簿領之曹，預筆削春秋之事。職非其稱，恩實不貲。此蓋伏遇皇帝陛下善述先猷，繼繩遐武。謂祖功之與宗德，照臨四紀之餘。自天聖迄於治平，備該萬事之統。將欲垂之不朽，是用載於信書。蒐擇衆材，付畀重任。臣謹當溫尋素學，啟發前篇，攷古史之見聞，助羣儒之論著。片言一字，雖慙微婉之辭；五志三科，庶裨闕漏之目。倘能卒業，無憚服勞。臣無任。

謝賜國史院開局銀絹

右臣伏蒙聖慈特降中使，賜臣開局例物銀器五十兩，絹五十疋者。史官論譔之司，初塵選用；內府幣餘之式，均荷恩霑。對渥澤之踰涯，思職憂而罔甚。伏念臣粵從藩翰，召置書筵。閱二聖之冊書，識諸凡之總載。懷鉛舐筆，愧非敘事之才；束帛兼金，例拜匪頒之惠。寵光所被，服用增慚。此蓋伏遇皇帝陛下待遇儒臣，祇嚴國典，俯記編摩之始，溥推賚予之私。遍及具僚，不遺末至。臣敢不服勤早夜，積思繅繅。期少補於信書，庶不孤於宸旨。

謝賜筆墨紙

右臣伏蒙聖慈特賜臣開局筆共七十管，墨五十錠，二十餅，紙共一十三軸者。摩研編削，濫官太史之司；授簡抽毫，獲識上方之品。緣國書而假寵，拜君賜以爲榮。伏念臣誦數陋儒，江湖遠守。偶藉和鈔之舊，擢登司籍之聯。閱東觀之典墳，方尋類例；給尚書之筆札，繼荷恩頒。物皆中御之珍，用非有司之稱。此蓋伏遇皇帝陛下緝熙世烈，載述聖謨，選求敘事之良，特記開編之始。綴象管寶跗之副，兼兔枝鸞素之奇。三具惟精，愧乏仲將

之敏手；百家可法，敢希班氏之立言。圖報萬全，暫勤一志。臣無任。

謝復諫議大夫

臣某言：伏奉告命，復授右諫議大夫，依前充集賢院學士，散官勳封如故，已祇受訖者。禋祀國之大事，俯遵熙成；正諫朝之諍臣，敢叨敘進。濯僭狂之深咎，還禁近之通班。榮渥所臨，愧顏交集。臣某中謝。伏念臣本非遠器，誤被上知。無潤色之才，濫司言綸；有迂疎之累，自絀刑章。流離外遷，奔馳末路。望之之試三輔，日懼有聞；中山之責九年，敢興滯念。間起江湖之守，召參筆削之司。入覲天光，獲觀國典。屬備輶軒之使，方走窮荒；薦逢泰時之祠，阻陪盛禮。何言罪戾，再預甄收。執簡書林，未責編摩之效；登坡掖省，復塵清要之途。內顧衰遲，難勝寵拔。此蓋伏遇皇帝陛下體乾之粹，報本於郊，不專享於福釐，遂溥行於渙號。振滯起廢，推惻怛於聖衷；量能授官，假名器於藁質。載念孤愚之蔽，擢從棄置之餘。肆赦眚災，恩所加者非一；從事盡瘁，義采切於在三。更當追省前非，往圖後效。職雖專於鉛槧，無敢越思；力可效於股肱，猶期自奮。益堅晚節，少答鴻私。臣無任。

濠州謝上

臣某言：伏奉告命，降授秘書監依前充集賢院學士知濠州軍州事，已於今月日到任禮上訖者。治劇政乖，坐絀有司之議；免官責薄，特寬投裔之誅。獲領左符，出居善地。彷徨去國，但追省於前非；怵惕臨州，固不遑於寧處。臣某中謝。伏念臣昨由藩守，入覲宸嚴。每惟罪戾之餘，絕觀光華之望。不圖寒迹，尚記清衷。繙二帝之經，擢參於史職；宣四方之命，備遣於使行。俄會京尹之缺員，首荷帝俞之超用。選掄誤及，秋毫皆出於上恩；蹇薄所鍾，弱質奚勝於重寄。徒夙宵而盡瘁，顧塵露以無裨。加以智有聾盲，識無遠大，事既失於不斷，慮又闕於關防。內史宜彈壓於豪強，而臣縱舍有罪；長官當督察於僚屬，而臣聽任匪謀。累速人言，上煩詔鞠。獄辭既具，國憲寧逃。豈謂伏遇皇帝陛下恢天地之蓋容，廣山川之藏納，念嘗更於任使，俯矜貸於庸昏。削籍近班，猶竊蘭臺之舊秩；假麾外服，仍分淮浦之近封。飲食足以奉偏親之旨甘，俸祿足以調敝族於溫飽。豈伊黜謫，遂此便安。實荷賜於君親，更腆顏於民吏。敢不刻心匪懈，盡節不渝。雖股肱之力已衰，無復期於遠到；而朝廷之士貴治，忍自棄於末年。誓勤宣布之謨，仰答生成之造。感深涕隕，言切魂飛。臣無任。

謝男駟賜進士出身

臣某言：進奏院報今日放進士榜，男駟賜出身者。計偕羣彥，並膺親策之榮；勳蔭晚生，誤竊世科之寵。方主臣之負罪，違孺子之逢辰。報自臚傳，慶叢私室。臣某中謝。伏以陛下發德音，下明詔，以求直言。有司進真賢，舉實廉，以奉大對。革曩歲詞章之舊，擢知經通博之才。詢事考言，既以觀其術畧；因能任職，又將究其施爲。蓋擇之而惟艱，加試之於已效。得人之盛，如古所稱。其在朝廷，彬彬多文學之士；見於事業，凜凜幾德誼之風。自非挾經世之謀，何以副揚廷之選。伏念臣承家有祿，教子無功。本惟樸學之傳，妄廁諸生之列。適會詔新於科制，因令時習於師言。居處園橋之門，寢聞講義；誦吟裘氏之地，竊服儒名。濫隨賢書，偶預奏籍。方時俊獻明之際，難銜淺聞；乘春霆振滯之辰，遂叨賜第。伏況臣一門在仕，三世決科。逮於羣從之間，繼有策名之美。斯亦聖代衣冠之榮觀，不勝遠方父子之遭逢。聞命兢惶，舉宗榮懼。此蓋伏遇皇帝陛下表章六學，損益百王，收覽四方之豪，樂聞三道之要。澤施無外，允臻至治之期；士生此時，固有非常之遇。何茲賤息，輒冒寵光。雖無贏金遺子之能，而有桂林衣綵之喜。但慙寡陋，仰玷明敷。臣謹當飭厲其衷，庶幾於道。教之吏事，則法令之文可師；繩以古人，則忠孝之言具在。

倘毫分之可報，雖糜粉以無辭。臣無任。

滄州謝上

臣某言：昨奉勅差知滄州軍州事，已於正月二十六日到任禮上訖者。滄海粵區，朔陲近塞。異時制敵，〔三〕本求將帥之才；聖旦撫封，參用文儒之士。猥緣資籍，得綰印章。泣止翰垣，屹然丘乘之衆；周視城塹，隱若金湯之堅。夫何遠孤，當是優寄。濫官有覲，懷懼兼常。臣某中謝。伏念臣稟賦拙艱，操修昧陋。早荷聖神之眷，擢躋禁近之聯。出屏藩宣，入領臺閣。日殫千慮，識暗乃涉於迂疎；每歷一官，寵過輒成於齟齬。再干吏議，動絀刑書。罪大責輕，固常蒙於天幸；恩深報寡，寢已迫於年衰。尚塵職秩之榮，坐貪祿食之厚。姑安散地，更省前非。豈謂伏蒙皇帝陛下德務在寬，仁不遺舊。運乾坤之造，震發於枯荄；委日月之明，照臨於幽薈。蕩滌瑕垢，歛收棄遺。初析盟津之符，既容自免；重假浮濱之節，復出殊私。逮於臨遣之辰，賜以清問之對。謂臣之數奇多難，特軫淵衷；勉臣以直道自明，屢形天語。重念悔尤之久積，親承訓勅之丁寧。豈止鞭策於疲驚，欲圖後效；固將灰粉於肌骨，庸副上知。遂奔走以之官，期夙宵而盡瘁。矧惟此郡，遠控殊方。久沐承平之風，號爲敦樸之俗。吏謹繩墨，民安里閭。外則邊堠無聲，內則河防有備。竊

居守辰，何所設施。謹當督責掾僚，講修農戰。旁宣主澤，冀編齊皆一於中和；外振國威，使夷落咸知於畏愛。倘賴仁天之覆護，少收治課之毫分。仰答生成，朶堅亮節。臣無任。

滄州謝傳宣撫問

右臣今日某官到州，伏蒙聖慈傳宣撫問者。邊城遠守，悵隔越於堯庭；使驛載馳，荷拊循於漢詔。眷諸曹之僚掾，逮連壘之兵師，咸聽敷言，交深舞抃。伏惟皇帝陛下至仁丕冒，盛德輝光。獫狁戒悚，戢於威懷；郡國虔遵於法令。因皇華之上計，曲賜周爰；降清問以下臨，不忘勤恤。仰天慈之寵被，動民聽以欣榮。臣叨假藩符，坐糜塞廩。戎亭偃革，無施橫草之勞；魏闕存心，但極傾葵之志。益殫瘁節，上答隆恩。臣無任。

謝復太中大夫

臣某言：伏蒙告命，特授太中大夫依前充集賢院學士差遣，散官封賜如故，卽時祇受訖者。觸嚴科而去位，歲歷三周；拔常憲以原官，秩增四等。省僇尤於既往，荷渥澤以朶優。內積兢慙，莫遑寧處。臣某中謝。伏念臣性鍾樸鈍，時邁亨嘉。藉文史之久資，被帝俞之誤獎。入持簪橐，兩綴從官之聯；出綰綬章，嘗更尹正之任。寵逾其量，悔積於躬。

衆毀所歸，誠以處下流之故；三已無愠，但慙孤上聖之知。一昨滄海賜環，中銓弄印。遠臣去國，敢言歸覲之期；內史贊方，中格除書之目。仰煩全度，曲示棄瑕。仍委典章之司，俾預討論之末。屬久從於吏役，加寢迫於衰年，既貽嘖言，固絕榮望。豈謂清衷垂憫，公議不遺。書未畢於汗青，命再頒於言綍。惟制祿貴階之品，視通閨近著之榮。匪用次遷，悉還舊貫。自卑而敘上，事固異於常倫；若沒而復浮，恩實均於再造。此蓋伏遇皇帝陛下以湯仁御衆，以周典平刑，溫嚴如寒暑之時，進退靡膝淵之異。式序儒行，有議郎大夫之名；振拔滯淹，忘一眚小疵之累。顧臣愚分，所蒙實多。敢不百慮在公，一心圖報。修其禮義，稍異匹夫之愚；加以忠貞，冀蹈古人之節。臣無任。

謝吏部侍郎

臣某言：伏奉制命，蒙恩特授臣通議大夫守尚書吏部侍郎者。治典一新，官儀大正。簡求髦彥，若時訓迪之謨；振舉滯遺，遂及妄庸之迹。仰膺殊渥，載惕丹誠。臣某中謝。竊惟在昔哲王，並建衆職。內則三公四輔，翼贊於皇猷；外則六卿百司，經營於世務。有道揆法守之敘，無言脞事易之非。故官得其人，而庶政惟和；事任其責，而萬目自舉。致治之極，何莫由斯。後王狃於因循，流品從而雜揉。臺省清崇之秩，或假寵以敘遷；中外

典領之科，因漸增於別使。朱紫無辨，要領莫尋。垂百數年，宜有不變。敝久必復，聖斷惟精。霈然發於德音，將以覈其名實。列文階之等級，所以革去虛稱；據職事之劇閒，所以裁爲中制。稽於古則文而不僭，驗於今則簡而易從。炳焉三代之規撫，垂爲百世之典則。煥號之始，僉言允諧。周禮太平之書，方復行於聖旦；尚書百官之本，任尤重於選曹。銓綜人流，助毗風化。建正置貳，使率屬而有差；因能任官，諒非賢而罔治。伏念臣早緣孤進，偶擢近班。在苒歲時，愧無塵露之益；間關憂患，寢傷齒髮之衰。一昨誤被甄收，預聞制作。迂儒曲學，何補舊儀之遺；近列清曹，並塵虛授之獎。況具員之初備，在首舉以尤艱。恩以假人，用非有次。勉臨所治，益畏攸箴。此蓋伏遇皇帝陛下蘊天縱之多能，富日新之盛德，步驟堯舜，庶績凝於九工；跨越漢唐，新書高於六典。特隆異數，式序羣才。振驚充庭，既集羽儀之盛；疲驚伏櫪，亦參仗衛之榮。誰料衰遲，適遭際會。敢不率循詔旨，探練故常。謹司籍之所藏，急古人之先務。重念遭迴之久，已甘棄置之中。睿明素審其無他，枯朽屢蒙於再造。超官賦祿，皆清衷特達之知；揣分量能，實望外踰涯之幸。屬限牽拘於嚴格，無由敘對於清閒。感極涕零，言殫喻拙。姑自期於瘁盡，庶不累於聖明。臣無任。

謝賜對衣金帶

右臣伏蒙聖慈特賜臣衣一對，金腰帶一條者。華省備官，叨貳銓衡之政；大庭賜服，榮兼金艾之章。祇荷寵光，內深震惕。伏念臣謏才無取，多難甫還。載荷甄陞，入塵清要。崇資峻職，皆躡等以冒遷；繁錫彝儀，出特恩之優異。襲衣纖麗，環帶輝華。分頒踰商筭之榮，佩服負梁鵠之愧。官有其責，固宜殫夙夜之勤；服文以容，敢不念忠純之守。仰酬洪造，誓罄一誠。臣無任。

謝正議大夫

臣某言：伏奉勅命，以臣曾預詳定官制，特授正議大夫。臣以任職無補，過叨寵擢。尋具狀辭免，乞賜寢停。蒙降詔書，所請宜不允者。治典更新，方正名於庶位；尸臣不職，謬增秩於班資。竊揣分以難安，因控章而避免。仰紆詔札，輒拜言綸。覩面目以增慙，鏤心膺而萃感。臣某中謝。竊於義師黃紀，治實本於建官；唐虞謨道，莫先於稽古。欽惟睿聖之有作，備該今昔之所宜。三臺五省之源流，悉從訂正；六職百工之鉅細，咸有綱條。煥乎一代之憲章，垂爲萬世之法則。取新去故，事皆出於淵衷；舉要治煩，功乃推於典領。

溥加獎錄，遂速庸虛。伏念臣學非夙成，老將耄及。向由簿領之任，擢預討論之司。議損益之緒文，則上遵於獨斷；攷冊書之故事，則旁出於衆僚。顧臣充員，迄無成效。延引歲月，當卽罪誅。豈意奉行之初，併霑優渥之澤。天官小宰，秩正三卿之聯；文散貴階，位躡大夫之四。寵靈特異，捧對若驚。內自省於冒塵，實夙遭於際會。此蓋伏遇皇帝陛下聖由天縱，性自誠明，躬萬務之幾微，起百王之廢墜。致治於未亂，以人而代工。謂周室之太平，禮經具載；嘉漢規之宏遠，官簿尚存。將建極於中和，首垂意於制作。甫頒新令，丕變周行。責實循名，居官者必任以事；等功第賞，有勞者不遺其能。曾是瑣微，薦膺殊選。臣敢不恭承上意，更勵末年。倘筋力之可支，惟詔條之是守。講朝廷之大議，誠無以異於衆人；習臺閣之舊聞，亦庶乎知之允蹈。主恩欲報，自誓彌堅。臣無任。

校記

〔一〕一邦 四庫本作「一都」。

〔三〕制敵 四庫本作「禦侮」。

蘇魏公文集卷三十九

表

謝光祿大夫

臣某言：近者伏遇車駕臨幸新省，推恩官屬。尋具奏陳辭免，蒙降詔書不允。伏奉告命，特授臣光祿大夫依前尚書吏部侍郎，仍加上護軍進封武功郡開國侯，食邑四百戶者。中臺成室，紆詔蹕之天臨。司列備員，奉王言之綸出。敘進上階之貴，且旌服采之勤。不獲避辭，交深惕厲。臣某中謝。竊以上之所行曰幸，人皆被於恩私；官以稱任爲差，吏乃知於獎勸。屬更新之會府，因親屈於帝尊。萬乘一遊，愈重南宮之故事；羣司百執，均蒙天子之龍光。顧慙充位之聯，竊與錄勞之賞。伏念臣材資弗茂，遭遇最先，出入禁闥者十有六年，典領銓衡者兩登三品。飛蕤鳴玉，濫肩簪橐之游；入墨出朱，每負簿書之殿。昨恭陪於法從，徧觀歷於省曹。中謁者之臚傳，側聞聖諭。正大夫之位序，遽忝平除。復推郊霈之釐，賜轉王功之等。進封侯社，衍賦戶田。名數併增，雖舉汎遷之例；階勳並進，實

爲非次之榮。況臣久荷聖知，寢蠲往咎，超資匪一，寓祿已高。惟今甄擢之憂，迴越輩倫之儼。加官貴乎四識，遂躡通班；典領首於貳卿，仍兼舊服。服彝甚寵，揣分奚勝。此蓋伏遇皇帝陛下稽古建官，因時立制，方修明於墜典，先崇大於列曹。既得其真賢實廉，委之事任；又加以高秩厚禮，勉彼修方。如臣譴涼，豈稱褒陟。三朝漢省，已叨過輦之恩；六典周官，願謹書屏之戒。惟悉心於吏課，冀少補於治綱。自餘傾謁之誠，更厲初終之節。死而後已，言豈敢渝。臣無任。

謝降詔已除刑部尚書

右臣八月初八日揚州遞到賜臣詔書一道，爲已除臣刑部尚書，候服闋日發來赴闕者。躬有親喪，纔踰中月。詔還朝序，忽降新恩。捧對言綸，交深感涕。伏念臣夙遭際會，久玷近嚴。罪負神明，禍延鞠育。銜恤在疚，茹痛無窮，泣血終天，永慕何及。州傳俄頒於朝命，草廬獲拜於天書。仰荷甄收，強扶痛疾。恭俟外除從吉，掃墓盡哀。勉力辦嚴，即時就道。倘未淪於顛殞，期入覲於威顏。論報君親，誓竭軀命。臣無任。

謝除刑部尚書

臣某言：奉告命，伏蒙聖恩特授臣守刑部尚書者。省座位崇，天書寵過。祇膺渙渥，內切兢惶。臣某中謝。伏以王者制五刑之中，以期於治。尚書爲萬事之本，用正厥官。惟典領之既煩，故事任之尤劇。皋陶之明克允，乃作虞之理官；仲尼之智且仁，嘗爲魯之司寇。其重如此，可繼者誰。方嗣聖君臨之初，革有司文峻之敝。秋卿之屬，皆知堯舜之在寬；風化所先，幾致成康之不式。長臨其職，未易其人。伏念臣才術非長，遭逢有素。先帝見謂愚直，曲加眷憐。收從三黜之餘，陞真二卿之列。天恩疊委，未施毫髮之勞。家禍重仍，俄抱充窮之痛。方切倚廬之念，遽驚下席之悲。君親之慕交深，霜露之濡再歷。既更中月，偶獲餘生。復邁聖明之期，旋蒙收恤之惠。詔還京闕，擢在省曹。輒揣分以辭難，俄賜書而趣拜。銜恩愈厚，受命思憂。此蓋伏遇皇帝陛下天錫至仁，日新盛德，將肅清於流品，因綜覈於人材。以命令之宏綱，非賢罔治；謂福威之大柄，惟辟所專。故拔用於文儒，俾參持於邦禁。豈伊衰朽，亦預選掄。敢不祇率乃僚，各共其事。念哀矜而用法，冀盡人情；罄勤瘁以在公，恪循官守。庶無敗曠，少答生成。臣無任。